

Na osnovu člana 24. Zakona o internoj reviziji institucija Bosne i Hercegovine („Službeni glasnik BiH”, br. 27/08 i 32/12), člana 33f. stav (2) Zakona o finansiranju institucija Bosne i Hercegovine („Službeni glasnik BiH”, br. 61/04, 49/09, 42/12, 87/12, 32/13 i 38/22) i člana 17. Zakona o Vijeću ministara Bosne i Hercegovine („Službeni glasnik BiH”, br. 38/02, 30/03, 42/03, 81/06, 76/07, 81/07, 94/07 i 24/08), a u vezi sa članom 90. Sporazuma o stabilizaciji i pridruživanju između Evropskih zajednica i njihovih država članica i Bosne i Hercegovine („Službeni glasnik BiH- Međunarodni ugovori”, broj 10/08) i Zaključka Vijeća ministara Bosne i Hercegovine broj 05-07-1-1582-7/24 od 10.7.2024. godine, Vijeće ministara Bosne i Hercegovine, na 33. vanrednoj (telefonskoj) sjednici, održanoj 2.8.2024. godine, donijelo je

ODLUKU

O USPOSTAVLJANJU CENTRALNE HARMONIZACIJSKE JEDINICE MINISTARSTVA FINANSIJA I TREZORA BOSNE I HERCEGOVINE

Član 1.

(Predmet Odluke)

Ovom odlukom uspostavlja se Centralna harmonizacijska jedinica Ministarstva finansija i trezora Bosne i Hercegovine (u daljnjem tekstu: CHJ MFiT BiH), uređuju status, organizacija, nadležnost i odgovornost, način rada i rukovođenje, koordinacija pri uspostavljanju i razvoju sistema finansijskog upravljanja i kontrole i interne revizije u institucijama Bosne i Hercegovine, kao i druga pitanja od značaja za rad CHJ MFiT BiH.

Član 2.

(Termini koji se koriste u Odluci)

U ovoj odluci koriste se termini iz Zakona o finansiranju institucija Bosne i Hercegovine („Službeni glasnik BiH”, br. 61/04, 49/09, 42/12, 87/12, 32/13 i 38/22) (u daljnjem tekstu: Zakon o finansiranju) i Zakona o internoj reviziji institucija Bosne i Hercegovine („Službeni glasnik BiH”, br. 27/08 i 32/12) (u daljnjem tekstu: Zakon o internoj reviziji).

Član 3.

(Status i organizacija CHJ MFiT BiH)

- (1) CHJ MFiT BiH ima status upravne organizacije koja je u sastavu Ministarstva finansija i trezora Bosne i Hercegovine.

- (2) Unutrašnju organizaciju CHJ MFiT BiH čine tri osnovne organizacione jedinice, od kojih je jedna organizaciona jedinica zadužena za uspostavljanje i razvoj finansijskog upravljanja i kontrole u institucijama Bosne i Hercegovine, druga za uspostavljanje i razvoj sistema interne revizije, a treća za poslove edukacije, pravne, finansijske i poslove informisanja.
- (3) Osnovne organizacione jedinice iz stava (2) ovoga člana u svom sastavu imaju najmanje dvije unutrašnje organizacione jedinice.
- (4) Osnovnim organizacionim jedinicama iz stava (2) ovoga člana rukovode pomoćnici direktora. Unutrašnjim organizacionim jedinicama iz stava (3) ovog člana rukovode šefovi odsjeka.
- (5) Unutrašnja organizacija CHJ MFiT BiH uređuje se Pravilnikom o unutrašnjoj organizaciji.
- (6) Pravilnik o unutrašnjoj organizaciji donosi ministar finansija i trezora Bosne i Hercegovine na prijedlog direktora CHJ MFiT BiH, uz saglasnost Vijeća ministara Bosne i Hercegovine.

Član 4.

(Nadležnosti i odgovornosti)

- (1) CHJ MFiT BiH je ovlaštena za razvoj, rukovođenje i koordinaciju finansijskog upravljanja i kontrole i interne revizije u institucijama Bosne i Hercegovine u skladu sa članom 33f. Zakona o finansiranju i čl. 24. i 25. Zakona o internoj reviziji.
- (2) CHJ MFiT BiH vrši koordinaciju i saradnju sa Centralnom jedinicom za harmonizaciju finansijskog upravljanja i kontrole i interne revizije Ministarstva finansija Republike Srpske, Centralnom harmonizacijskom jedinicom Federalnog ministarstva finansija Federacije Bosne i Hercegovine i Centralnom harmonizacijskom jedinicom Direkcije za finansije Brčko distrikta Bosne i Hercegovine.
- (3) Koordinacija i saradnja iz stava (2) ovog člana realizuje se putem Koordinacionog odbora centralnih jedinica za harmonizaciju (u daljnjem tekstu: KO CJH).
- (4) U oblasti finansijskog upravljanja i kontrole CHJ MFiT BiH nadležna je za:
 - a) pripremu i ažuriranje strateških dokumenta i smjernica iz oblasti finansijskog upravljanja i kontrole u skladu sa međunarodno prihvaćenim standardima, standardima interne kontrole, praksama i propisima u Evropskoj uniji;

- b) pripremu prijedloga zakona i podzakonskih akata iz oblasti finansijskog upravljanja i kontrole u institucijama Bosne i Hercegovine;
- c) definisanje sadržaja programa obuke i koordinaciju programa obuke iz oblasti finansijskog upravljanja i kontrole u institucijama Bosne i Hercegovine;
- d) procjenu sistema i kvaliteta sistema finansijskog upravljanja i kontrole u institucijama Bosne i Hercegovine;
- e) vršenje analiza i predlaganje operativnih rješenja kojima se unapređuje finansijsko upravljanje i kontrola u institucijama Bosne i Hercegovine;
- f) propisivanje forme godišnjeg izvještaja, postupaka i rokova izvještavanja o finansijskom upravljanju i kontroli institucija Bosne i Hercegovine;
- g) praćenje primjene propisa iz oblasti finansijskog upravljanja i kontrole na osnovu godišnjih izvještaja o finansijskom upravljanju i kontroli koje institucije Bosne i Hercegovine dostavljaju CHJ MFiT BiH;
- h) izradu konsolidovanog godišnjeg izvještaja o sistemu finansijskog upravljanja i kontrole u institucijama Bosne i Hercegovine.

(5) U oblasti interne revizije CHJ MFiT BiH odgovorna je za:

- a) pripremu prijedloga zakona i podzakonskih akata iz oblasti interne revizije u institucijama Bosne i Hercegovine, nakon usaglašavanja u KO CJH;
- b) pripremu i realizaciju programa obuke i certificiranje internih revizora institucija Bosne i Hercegovine, nakon usaglašavanja programa obuke u KO CJH;
- c) usvajanje i primjenu standarda za internu reviziju u institucijama Bosne i Hercegovine i Kodeksa profesionalne etike za interne revizore, nakon usaglašavanja u KO CJH;
- d) usvajanje i primjenu radne metodologije interne revizije, nakon usaglašavanja u KO CJH;
- e) pripremu i ažuriranje strateških dokumenta i smjernica iz oblasti interne revizije u skladu sa međunarodno prihvaćenim standardima, standardima interne revizije, praksama i propisima;
- f) davanje saglasnosti na pravilnike o sistematizaciji organizacija koje uspostavljaju jedinice interne revizije u dijelu koji se odnosi na internu reviziju;
- g) koordinaciju rada jedinica interne revizije u institucijama Bosne i Hercegovine i uspostavljanje veza sa državnim i međunarodnim institucijama u oblasti interne revizije;

- h) davanje saglasnosti na izbor rukovodilaca jedinica za internu reviziju i na uspostavljanje odbora za reviziju;
- i) saradnju sa Uredom za reviziju institucija Bosne i Hercegovine s ciljem ostvarivanja efikasne i djelotvorne interne i eksterne revizije;
- j) nadzor nad provođenjem svih primjenjivih regulativa za internu reviziju od strane jedinica za internu reviziju;
- k) rješavanje neslaganja u mišljenjima, po zahtjevu i potrebi, između rukovodioca interne revizije i rukovodioca organizacije;
- l) definisanje kriterija za uspostavljanje jedinica interne revizije u skladu sa Zakonom o internoj reviziji;
- m) definisanje kriterija za zapošljavanje izvršilaca u jedinicama za internu reviziju i donošenje pravilnika o zapošljavanju internih revizora;
- n) definisanje vremenskog okvira eksterne kontrole kvaliteta i izbora osoba ili nezavisne organizacije za eksternu kontrolu kvaliteta;
- o) davanje saglasnosti za uspostavljanje odbora za reviziju u skladu sa članom 22. Zakona o internoj reviziji.

Član 5.

(Rukovođenje CHJ MFiT BiH)

- (1) Radom CHJ MFiT BiH rukovodi direktor koji ima status sekretara sa posebnim zadatkom.
- (2) Direktora CHJ MFiT BiH imenuje Vijeće ministara Bosne i Hercegovine, na prijedlog ministra finansija i trezora Bosne i Hercegovine, nakon provedene konkursne procedure propisane Zakonom o državnoj službi u institucijama Bosne i Hercegovine („Službeni glasnik BiH”, br. 19/02, 35/03, 4/04, 17/04, 26/04, 37/04, 48/05, 2/06, 32/07, 43/09, 8/10, 40/12, 93/17 i 18/24).
- (3) Imenovanje direktora vrši se na period od pet godina.
- (4) Direktor CHJ MFiT BiH ima zamjenika, koji mijenja direktora ukoliko direktor nije u mogućnosti da obavlja svoja ovlaštenja i obaveze.
- (5) Posebni uslovi za imenovanje direktora i zamjenika direktora CHJ propisani su Pravilnikom o unutrašnjoj organizaciji i sistematizaciji radnih mjesta u CHJ MFT BiH koji

donosi ministar finansija i trezora Bosne i Hercegovine na prijedlog direktora CHJ MFiT BiH, uz saglasnost Vijeća ministara Bosne i Hercegovine.

Član 6.

(Dužnosti i odgovornosti direktora CHJ MFiT BiH)

- (1) Direktor CHJ MFiT BiH odgovoran je za:
- a) predstavljanje CHJ MFiT BiH;
 - b) rukovođenje i usmjeravanje u obavljanju poslova iz nadležnosti CHJ MFiT BiH;
 - c) obavljanje drugih dužnosti direktora CHJ MFiT BiH propisanih Zakonom o finansiranju i Zakonom o internoj reviziji;
 - d) izvršavanje svih odgovornosti, ovlaštenja i aktivnosti predviđenih članom 4. ove odluke.
- (2) Direktor CHJ MFiT BiH po dužnosti je jedan od članova KO CJH u skladu sa čl. 33f. i 33h. Zakona o finansiranju i članom 27. Zakona o internoj reviziji.
- (3) U skladu sa članom 21. Zakona o ministarstvima i drugim organima uprave Bosne i Hercegovine („Službeni glasnik BiH”, br. 5/03, 42/03, 26/04, 42/04, 45/06, 88/07, 35/09, 59/09, 103/09, 87/12, 6/13, 19/16 i 83/17) direktor CHJ MFiT BiH za svoj rad odgovara Vijeću ministara Bosne i Hercegovine i ministru finansija i trezora Bosne i Hercegovine.

Član 7.

(Prestanak važenja)

Danom stupanja na snagu ove odluke prestaje da važi Odluka o uspostavljanju Centralne harmonizacijske jedinice Ministarstva finansija i trezora Bosne i Hercegovine („Službeni glasnik BiH” br. 44/09 i 48/18).

Član 8.

(Stupanje na snagu)

Ova odluka stupa na snagu danom donošenja i objavljuje se u “Službenom glasniku BiH”.

VM 146/24

2.8.2024. godine

Sarajevo

Predsjedavajuća

Vijeća ministara BiH

Borjana Krišto